

## DÍDZA'DAU' ZI'AL BUZUJË' LU GUICH SAN JUAN

### *Didza' nabániru'*

<sup>1</sup> Rguíxjöi'tu' lbi'ili' ca nac queë' Bönni' na' zoaczë' dza ni'të, le byöñitu' bë'ë didza', len le blé'itu' ca nac queë', len le buyutu' benë' Bönni' na'. Gdantu' Lë'. Bönni' ni naquë' Jesús, lë' ca' Didza' Nabánigac Bunách.

<sup>2</sup> Bönni' na' nabánigac bunách buluí' lahuë', ati' blé'itu' Lë'. Runtu' lna' lau queë', len rguíxjöi'tu' lbi'ili' ca nac queë' Bönni' na' nabániru'. Bönni' ni gzóalenë' Dios Xuz, len chduluí' lahuë' ga zoaru'.

<sup>3</sup> Le blé'itu' len le byöñitu' rguíxjöi'tu' lbi'ili' quië gacli' ca' lbi'ili' tuz len netu'. Le nactë yöl-la' tuz queëru' len Dios Xuz lenca' len Jesucristo Zxi'në' Dios nac.

<sup>4</sup> Ruzujtu' queëli' lu guich lë ni quië gac udzójiru' gdu ládxi'ru'.

### *Dios naquë'yení'*

<sup>5</sup> Lë ni nac didza' byöñitu' bë'lenë' netu' didza' Jesús, ati' le rguíxjöi'tu' lbi'ili'. Cni rna: “Dios naquë' yení', ati' nítú le nac chul xöhui' cutu runë' Lë'.”

<sup>6</sup> Chqui' gnaru': “Nacru' tuz len Dios”, san chqui' runru' le nac chul xöhui', lë ni nac bë' rzi' yë'ru' len cutu runru' le nac gdutë li.

<sup>7</sup> Na'a, chqui' runru' dxi'a, rdaru' lu yení' ca na' Lë' naquë' dxi'a, zoë' lu yení', nacru' tuz turu' len

yeturu', ati' xchönë' Jesucristo, Zxi'në' Dios ruún rë'u dxi'a, rugúa yúgu'të dul-la' nabága'ru'.

<sup>8</sup> Chqui' rnaru': "Cutu bi dul-la' runru'", rzi' yé'iru' la' cuinzru', len cunazí' lu na'ru' le nac gdutë li.

<sup>9</sup> Chqui' gxualëpru' lahuë' dul-la' nabága'ru', Dios runë' ca rnë', len naquë' tsahui'. Unít lahuë' dul-la' nabága'ru' len unë' rë'u dxi'a, ugúë' yúgu'të le cunác dzag rë'u.

<sup>10</sup> Chqui' gnaru': "Cutu bi dul-la' nabága'ru'", nac ca gnaru': "Dios rzi' yë'ë", ati' didza' queë' cutu runru' ca rna.

## 2

### *Cristo naquë' Nu rudöd xtídza'ru' lahuë' Dios*

<sup>1</sup> Lbi'ili', zxi'na'dau', ruzuja' queëli' lu guich lë ni, cui gunli' dul-la'. Na'a, chqui' núti'tëz nu gun dul-la', zoa nu rudöd xtídza'ru' lahuë' Dios Xuz, Lë' Jesucristo, Nu nac tsahui'.

<sup>2</sup> Nacczë' Nu budöd cuini, gutië' quië bugúë' dul-la' nabága'ru' lahuë' Dios. Clëgz gutië' quië bugúë' dul-la' nabága'ru' rë'u, san gutië' ca' quië bugúë' dul-la' nabága'gac bunách gdutë yödzyú.

<sup>3</sup> Chqui' runru' ca nac le gna bé'inë' rë'u, nöziru' chnúnbë'ru' Lë'.

<sup>4</sup> Nu rna: "Neda' núnbë'a-në' Dios", san cutu run ca rna bë' zxba queë', nu ni rzi' yë', len cutu run le nac gdutë li.

<sup>5</sup> Nu run ca rna xtídzë'ë Dios, le nactë nadxí'i Dios nu ni ca ral-la' gun. Chqui' runru' cni, nöziru' náquiru' queë' Dios.

6 Lëzca' cni, nu rna: “Neda' náquida' queë' Cristo”, ral-la' gac nu na' ca na' guquë' Cristo cati' gdë' yödzlyú ni.

### *Tu zxba cub*

7 Böchi' lza'adau', ruzuja' queëli' lu guich zxba ni. Cutu nac tu zxba cub, san zxba gul na', le zoalen lbi'ili' dza ni'të. Zxba gul na' nac didza' byönili' dza ni'të.

8 Lëzca' nac ca ruzuja' queëli' lu guich tu zxba cub, lë na' le nactë benë' Jesús ca rna, ati' runli' ca' lbi'ili' ca rna, le chrdöd qui le nac chul xöhui', ati' yení' gdu chrzení'.

9 Nu rna: “Zoa' lu yení'”, san curle'i dxi'a böchi' lzë'i, nu ni ni run le nac chul xöhui'.

10 Zoa lu yení' nu nadxí'i böchi' lzë'i, len cutu zoalen lei le run ga nu gchixi gnigui.

11 Run le nac chul xöhui' nu curle'i dxi'a böchi' lzë'i, len rda ga chul. Cutu nözi ga zeaj, le run ga nachúl nanít nu na' le nac chul na'.

12 Ruzuja' queëli' lu guich, zxí'na'dau', le chbunít lahuë' Dios dul-la' nabága'li', le runë' le gzxi' lu në'ë gunë'.

13 Ruzuja' queëli' lu guich, lbi'ili' nacli' xuz, le núnbë'li' Nu na' zoacz dza ni'të. Ruzuja' queëli' lu guich, bi'i ra'bán, le chbuxicjli' tu' xöhui'.

14 Chbuzuja' queëli' lu guich, zxí'na'dau', le núnbë'li'-në' Dios Xuz. Chbuzuja' queëli' lu guich, lbi'ili' nacli' xuz, le núnbë'li' Nu na' zoacz dza ni'të. Chbuzuja' queëli' lu guich, bi'i ra'bán, le nacli' bi'i nal, ati' xtidzë'ë Dios nazí' lu na'li', len chbuxicjli' tu' xöhui'.

15 Cutu gdxi'izli' yödzyú ni, len clëg le dë yödzyú ni. Chqui' zoa nu nadxi'i yödzyú, cutu nadxi'i Dios Xuz.

16 Cni nac, le cutu nac le rë'nnë' Dios Xuz le tun bunách yödzyú ni, san nac le të'ni bunách yödzyú ni. Tunë' le rdzag ladxì' yöl-la' bunáchz quequë'. Tunë' le rdani yøj lauquë' le cunác. Tun ba zxön cuinquë' ni'a qui le dë quequë'. Cni nacgac le cunác tunë'.

17 Huadöd qui yödzyú ni lenca' qui le ta'zë ladxì'gac bunách, san nu run ca rë'nnë' Dios soa tsalzú.

*Nu rui' didza' gdu'të li len nu rzi' yë'*

18 Zxi'na'dau', chzoaru' dza udx, len ca na' chbyönili' huidë' bönni' rdá'baguë'ë Cristo, lëzca' na'a chgzu lau naculé zian bönni' ta'dá'baguë'ë Cristo. Qui lë ni na' nöziru' chzoaru' dza udx.

19 Gularujë' ladjru' bönni' cni, san cutu glaquë' tuz len rë'u. La'naru' glaquë' tuz len rë'u, la'cuá'lenteczë' rë'u. Na'a, gularujë' quië gac bë' cutu nacquë' tuz len rë'u yúgu'të'.

20 Na'a, chzoalen lbi'ili' Bö' La'y nagu'ë rë'u Nu nac la'y, ati' nöziczli' yúgu'të.

21 Buzuja' queëli' lu guich, le chnözili' le nac gdu'të li, len clëg le cunözili' lei. Nözili' ca' cutu ca' rzi' yë' nu nözi le nac gdu'të li.

22 ¿Nuzxa caz na' nu rzi' yë'? ¿Naru' cu nac nu na' rdá'baga' naquë' Jesús Nu bsölë'ë Dios? Nac nu ni bönni' rdá'baguë'ë Cristo, le rdá'baguë'ë naquë' Dios Xuzë' Jesús, len rdá'baguë'ë ca' naquë' Jesús Zxi'në' Dios.

23 Núti'tëz nu rdá'baga' Dios Zxi'n, cutu ca' zóalenë' nu na' Dios Xuz. Núti'tëz nu rnë yalj lulu

naquë' Zxi'në' Dios Jesús, lëzca' zóalenë' nu na' Dios Xuz.

<sup>24</sup> Na'a, gul-güü' latj ugá'nlentecz lbi'ili' le byönili' dza ni'të. Chqui' ugá'nlentecz lbi'ili' le byönili' dza ni'të, lëzca' lbi'ili' ugá'nlenteczli'-në' Dios Zxi'n lenca' len Dios Xuz.

<sup>25</sup> Nac lë ni le gzxi' lu në'ë Dios, gunnë' queëru' yöl-la' na'bán gdu.

<sup>26</sup> Chbuzuja' queëli' lu guich lë ni ca nac quegac nup ta'zí' ye'i lbi'ili'.

<sup>27</sup> Na'a, zóalenë' lbi'ili' Dios Bö' La'y. Bsölë'ë Lë' queëli' Cristo, ati' Lëczë' zóalenteczë' lbi'ili'. Qui lë ni na' cutu rquínili' nu usëdi lbi'ili', le choalen lbi'ili' Nu na' rusëdi lbi'ili', ati' didza' gdutë li ru'ë Lë' len cutu rzi' yë'ë. Ca na' chnazëdli', gul-zóalenteczë' Cristo.

<sup>28</sup> Na'a, zxi'na'dau', gul-zóalenteczë' Cristo quië cati' uluí' lahuë' Lë', gacru' rugu ladxi', len cutu utui'ru' soaru' lahuë' Lë' cati' huödë'.

<sup>29</sup> Chqui' nözili' naquë' tsahui' Dios, ral-la' gnözili' ca' nacgac zxi'në' Dios yúgu'të nup tun le nac tsahui'.

### 3

#### *Nup nacgac zxi'në' Dios*

<sup>1</sup> Gul-yú ca nadxí'itsquinë' rë'u Dios Xuz, benë' ga nazí' laru' zxi'në' Dioscz. Qui lë ni na' cutu ca' núnbë'gac le nacru' bunách yödzyú ni, le cutu glunbë'ë Jesús.

<sup>2</sup> Böchi' lza'adau', na'a chnacru' zxi'në' Dios, len cutu nac bé'ini le ral-la' gacru'. Nöziru' cati' uluí' lahuë' Jesús, gacru' ca naquë' Lë', le glé'iru'-në' catëz naquë' Lë'.

<sup>3</sup> Núti'tèz nu run löz gac ca naquë' Jesús, rui' ladxi' gac dxi'a nu na' ca na' naquë' dxi'a Jesús.

<sup>4</sup> Núti'tèz nu run dul-la' rguitsj zxba queë' Dios, le nac le rguitsj zxba le nac dul-la'.

<sup>5</sup> Nözili' buluí' lahuë' Jesús quië bugüë' dul-la' nabága'ru', len cutu bi dul-la' runë' Lë'.

<sup>6</sup> Núti'tèz nu dzag Lë' cutu run dul-la'. Núti'tèz nu run dul-la' gatga ble'i Lë' len cutu nunbë' Lë' Jesús.

<sup>7</sup> Zxí'na'dau', qui nadxi nu si' ye'i lbi'ili'. Nu run le nac tsahui', nac tsahui' nu na' ca na' naquë' tsahui' Jesús.

<sup>8</sup> Nu runtecz dul-la' naqui qui tu' xöhui', le run dul-la' tu' xöhui' dza ni'të. Qui lë ni na' dului' lahuë' Zxi'në' Dios, quië usnitië' yugu' le nun tu' xöhui'.

<sup>9</sup> Núti'tèz nu nac zxi'në' Dios cutu runtecz dul-la', le zóalentez nu na' le nazí' nu na' lu në'ë Dios Xuz.

<sup>10</sup> Cni nac bë' nup nacgac zxi'në' Dios len nup nacgac zxi'n tu' xöhui'. Núti'tèz nu curún le nac tsahui' len cunadxí'i böchi' lzë'i cutu naqui queë' Dios.

*Ral-la' gdx'i'cru'-në' böchi'ru' ta'yejlë'ë Cristo*

<sup>11</sup> Lë ni nac didza' chbyönili' dza ni'të, le rna: "Ral-la' gdx'i'ru' lza'ru' turu' yeturu'."

<sup>12</sup> Cutu ral-la' gunru' ca na' benë' Caín. Guquë' Caín qui tu' xöhui' ati' budöddë'-bi' bi'i böchë'ë. ¿Bizx quië budöddë'-bi' bi'i böchë'ë? Budöddë'-bi' le glac le cunác le benë' Caín na', san le benbi' bi'i böchë'ë, tsahui' glac.

<sup>13</sup> Böcha'adau', cutu ubánili' chqui' cuta'le'i lbi'ili' dxi'a bunách yödzyú ni.

14 Nőziru' chgdödru' lu yöl-la' gut len chdë queëru' yöl-la' na'bán gdu le nadxí'igacru'-në' böchi'ru'. Nu cutu nadxí'i böchi' lzë'i, chnatz nu na'.

15 Núti'tëz nu curle'i dxi'a böchi' lzë'i, nac gdödi bunách nu na', ati' nözili' cutu dë yöl-la' na'bán gdu qui nitú nu rudödi bunách.

16 Cni núnbë'ru' yöl-la' nadxí'i le nac gdu, le budödë' yöl-la' na'bán queë' Jesús, gutië' uláz queëru'. Lëzca' cni rë'u ral-la' udödru' yöl-la' na'bán queëru', gáclencru'-në' böchi'ru'.

17 Na'a, núti'tëz nu dë yöl-la' tsahui' qui, lë na' dë yödzyú ni, ati' rle'i böchi' lzë'i, bi ryadzj queë', len cutu ruhuechi' ladxi' lë', bi unödzy queë', ¿naru' nadxi'itsa Dios nu na'?

18 Zxí'na'dau', ral-la' gdxí'iru' lza'ru', clëg len didza'z o lu yöl-la' rnëz queëru', san gdu ládxi'ru' lenca' len gdutë yöl-la' run queëru' ral-la' gdxí'iru' lza'ru'.

### *Le runru' löz lahuë' Dios*

19-20 Chqui' cni nadxi'icru'-në' böchi' lza'aru', nöziru' náquiru' qui Nu na' nac gdutë li, ati' lahuë' Dios huac cö' dxi' icj ládxi'dau'ru' chqui' ruxös rë'u ládxi'dau'ru', le ráctscarë' Dios ca ládxi'dau'ru', ati' Lë' nözcnë' yúgütë.

21 Böchi' lza'adau', chqui' cutu ruxös rë'u ládxi'dau'ru', dë le runru' löz lahuë' Dios

22 le nöziru' gunnë' queëru' bíti'tëz bi gnabru' lahuë'. Cni nac, le runru' ca rna bë' zxba queë' len le rdzag ladxë'ë Lë'.

23 Lë ni nac zxba queë', quië tséjlë'ru'-në' Je-sucristo, Zxi'në' Dios, len gdxí'iru' lza'ru' ca na' chgna bé'inë' rë'u.

24 Zoalen Dios nu run ca rna bë' zxba queë', ati' Dioscz zóalenë' nu na'. Cni nõziru' dzágteczë' rë'u Lë', le chbsölë'ë queëru' Dios Bö' La'y.

## 4

### *Le nac bë' zóalenë' rë'u Dios Bö' La'y*

1 Böchi' lza'adau', cutu tséjlë'li' núti'tëz nu rna zóalenë' lei Dios Bö' La'y, san gul-sí' bë' nu na', chqui' zóalenë' lei Dios Bö' La'y, le ta'dë' yödzyú ni zian bönni' ta'zí' yë'ë, ta'në' tu'ë didza' uláz queë' Dios.

2 Cni gúnbë'li'-në' bönni' zóalenë' lë' Dios Bö' La'y. Naqui queë' Dios bönni' rnë' yalj lulu ca bidë' Jesucristo, Nu bsölë'ë Dios, rnë' guquë' gdu bunách.

3 Lëzca' cni, cutu naqui queë' Dios bönni' cutu rnë' yalj lulu ca bidë' Jesucristo, rnë' cutu guquë' gdu bunách. Bönni' ni náquinë' qui nu na' rdá'baga' Cristo, nu na' chbyönili' ral-la' guid, ati' na'a chzoa rda yödzyú ni.

4 Zxí'na'dau', náquili' queë' Dios, len chbuxicjli' nup na' ta'zí' yë', le napr yöl-la' huac uná bë' Nu na' zoalen lbi'ili' ca nu na' rda yödzyú ni.

5 Lequë' nacquë' bunách yödzyú. Qui lë ni na' tu'ë didza' qui le nac qui yödzyú, ati' bunách yödzyú ni tu'zë naggac lequë'.

6 Náquiru' rë'u queë' Dios. Nu nunbë' Dios ruzë nag rë'u. Nu cunaqui queë' Dios cutu ruzë nag rë'u. Cni núnbë'ru' nu na' yu'u lei Bö' rui' didza' le nac gdu'të li lenca' nu na' yu'u lei bö' rzi' yë'.

### *Naljlen Dios yöl-la' nadxí'i*



7 Böchi' lza'adau', ral-la' gdxiru' lza'ru', le naljlen Dios yöl-la' nadxí'i, ati' núti'téz nu nadxí'i lzé'i naljlen ca' Dios, len nunbè' Dios.

8 Nu cunadxí'i lzé'i, cutu nunbè' Dios, le naljlen Dios yöl-la' nadxí'i.

9 Cni bulu'è lahui ca nadxí'inè' rè'u Dios, bsölè'è yödzlyú ni la'z dui Zxi'nczè', quiè gata' queèru' yöl-la' na'bán gdu ni'a queè' Lè'.

10 Cni nac bè' yöl-la' nadxí'i gdu, clèg ca nadxí'iru'-nè' Dios, san ca na' Lè' bdxí'inè' rè'u, len bsölè'è Zxi'nczè' quiè gutiè', bugú'è dul-la' nabága'ru'.

11 Böchi' lza'adau', chqui' cni bdxí'itsquinè' rè'u Dios, lèzca' rè'u ral-la' gdxiru' lza'ru'.

12 Gatga nu ble'i Dios, san chqui' nadxí'iru' lza'ru', Dios zóalenè' rè'u ati' nac bè' nadxí'iru'-nè' Dios gdu ládxi'ru'.

13 Nóziru' zóalenru'-nè' Dios, ati' Lè' zóalenè' rè'u, le bsölè'è queèru' Dios Bö' La'y.

14 Netu' blé'itu' le benè' Dios Xuz, len runtu' lna' lau qui. Lè' bsölè'è Zxi'nczè' Nu ruslá bunách yödzlyú.

15 Nu rnè yalj lulu naquè' Jesús Zxi'nè' Dios, Dios zóalenczè' nu na', ati' lei zoalen Dios.

16 Rè'u ni nóziru' len réjlè'ru' nadxí'inè' rè'u Dios. Naljlen Dios yöl-la' nadxí'i, ati' nu nadxí'i lzé'i, zoalen Dios nu na', ati' Dios zóalenè' lei.

17 Cni run dxin lu icj ládxi'dau'ru' yöl-la' nadxí'i, run ga cutur rádxi'ru' dza gchuguè' Dios quegac bunách. Ca naquè' Jesús, nacru' ca' rè'u yödzlyú ni.

18 Chqui' gdxí'iru'-nè' Dios, cutu bi gádxiru'. Cati' nadxí'iru'-nè' Dios gdu ládxi'ru', runè' ga cutu

rádxiru'. Nu radxi, rzaca' rgui'i. Nu na' radxi, cutu nadxí'i Dios gdu ladxi'.

<sup>19</sup> Rë'u ni nadxi'iru'-në' Dios, le bdxí'icznë' rë'u zi'al Lë'.

<sup>20</sup> Chqui' nu gna: “Neda' nadxi'ida'-në' Dios”, san cutu rle'i dxi'a böchi' lzë'i, nu ni rzi' yë'. Nu cutu nadxí'i böchi' lzë'i nu rlé'itë, ¿nacxcz gac gdxí'i Dios len gatga ble'i Lë'?

<sup>21</sup> Cni gna bé'inë' rë'u Jesús, gnë': “Nu nadxí'i Dios, ral-la' gdxí'i ca' böchi' lzë'i.”

## 5

### *Ca gac uxícjru' lu le rac queëru' yödzyú ni*

<sup>1</sup> Núti'tëz nu rejlä' Jesús naquë' Cristo, nac zxi'në' Dios nu na', ati' núti'tëz nu nadxí'i Dios Nu buzóa lei, ral-la' gdxí'i ca' lzë'i nu nac zxi'në' Dios.

<sup>2</sup> Cni ráquibe'iru' nadxí'igacru'-bi' zxi'në' Dios. Nac cni chqui' nadxi'iru'-në' Dios len runru' ca rna bé'inë' rë'u.

<sup>3</sup> Cni nac bë' nadxi'iru'-në' Dios. Nac cni chqui' runru' ca rna bé'inë' rë'u, len cutu nac baníg lë na' rna bé'inë' rë'u.

<sup>4</sup> Núti'tëz nu nac zxi'në' Dios ruxícj lu le rac yödzyú ni. Chbuxícjru' lu le rac yödzyú le réjlë'ru'-në' Dios.

<sup>5</sup> ¿Nuzxa na' ruxícj lu le rac yödzyú? Run cni nu rejlä' naquë' Jesús Zxi'në' Dios.

### *Dios Bö' La'y runë' lna' lau queë' Cristo*

<sup>6</sup> Cni blë'ë Jesucristo, bidë' bdilë' nis, len bulaljë' xchönë', len clëgz bdilë' nis, san lëzca' bulaljë' xchönë'. Dios Bö' La'y naquë' Nu run lna' lau queë', le nac gdutë li didza' ru'ë Dios Bö' La'y.

<sup>7</sup> Tsonn nup tun lna' lau queë' Jesús ni' yehua' yubá, Dios Xuz, len Dios Zxi'n, lè' ca' Didza', len Dios Bö' La'y. Yonnë' ni, tuz nacquë'.

<sup>8</sup> Lëzca' cni, tsonn le tun lna' lau queë' luyú ni, Dios Bö' La'y, len le bdilë' nis Jesús, len rön ni' bulaljë' lë'i yag cruz, ati' yonn ni, tuz ca ta'ná.

<sup>9</sup> Chqui' si' lu na'ru' le tun lna' lau bunách, le runë' lna' lau Dios nactër lsaca'. Lë na' benë' lna' lau Dios nac le benë' lna' lau queë' Jesús, gnë' naquë' Zxi'nczë'.

<sup>10</sup> Nu rejlä' Zxi'në' Dios, nazí' lu në'i le nunë' lna' lau Dios. Nu curejlë' Dios, nac ca rna nu na': "Dios rzi' yë'ë." Cni nac, le cutu gyejlë' le benë' lna' lau Dios queë' Zxi'në'.

<sup>11</sup> Lë ni nac le benë' lna' lau Dios. Gnë' chbennë' queëru' yöl-la' na'bán gdu, ati' Zxi'në' na' naquë' Nu nabániru' cni.

<sup>12</sup> Nu zóalenë' lei Zxi'në' Dios, dë yöl-la' na'bán gdu qui. Nu cuzóalenë' lei Zxi'në' Dios, cutu dë yöl-la' na'bán gdu qui.

*Ca gnöziru' dë queëru' yöl-la' na'bán gdu*

<sup>13</sup> Lbi'ili' na' réjlë'li'-në' Zxi'në' Dios, ruzuja' queëli' lu guich lë ni quië gnözili' chdë yöl-la' na'bán gdu queëli', len quië gac gdu ca réjlë'li'-në' Zxi'në' Dios.

<sup>14</sup> Lë ni nac le ruzxöni ládxi'ru' Lë'. Chqui' bi gnabru' lahuë' ca rë'nnë' Lë', Lë' ryönnë' rë'u.

<sup>15</sup> Chqui' nöziru' ryönnë' rë'u ca nac bi rnábiru' Lë', nöziru' ca' gdél-li'czru' lë na' rnabru' lahuë'.

<sup>16</sup> Chqui' nu gle'i böchi' lzë'i run dul-la' cunachë' yöl-la' gut, ral-la' gnab qui nu na' lahuë' Dios, ati' Lë' gunnë' yöl-la' na'bán qui. Cni rnia': Ral-la' gnabli' quegac nup tun dul-la' cunachë' yöl-la' gut.

Dë dul-la' nachë' yöl-la' gut. Cutu rnia' gnabli' qui nu run dul-la' cni.

<sup>17</sup> Yúgu'të le cunác tsahui' nac dul-la', san dë dul-la' cunachë' yöl-la' gut.

<sup>18</sup> Nöziru' cutu runtecz dul-la' nu nac zxi'në' Dios, le run chí'ë nu na' Zxi'nczë' Dios, ati' tu' xöhui' cutu saqui' bi gun qui.

<sup>19</sup> Nöziru' yu'uru' lu në'ë Dios, ati' yu'ugac lu na' tu' xöhui' yúgu'të bunách tui' ládxi'gac le dë yödzyú ni.

<sup>20</sup> Na'a, nöziru' chbidë' ni Zxi'në' Dios, len bennë' queëru' yöl-la' rejni'i, quië gúnbë'ru' Nu na' nac gdutë li. Zóalenru' Nu na' nac gdutë li le zóalenru'-në' Jesucristo, Zxi'në' Dios. Nu ni nac Dios gdu, len Nu runn queëru' yöl-la' na'bán gdu.

<sup>21</sup> Zxi'na'dau', gul-gún chí'i cuinli' cui tsej ládxi'cli' bdau' guiöj bdau' yag. Ca' gac.

**Didza' cub rucá'n tsahui'**  
**New Testament in Zapotec, Southern Rincon**  
**(MX:zsr:Zapotec, Southern Rincon)**

copyright © 1992 Wycliffe Bible Translators, Inc.

Language: Zapotec, Southern Rincon

Translation by: Wycliffe Bible Translators, Inc.

Zapoteco, Rincón Sur [zsr], Mexico

**Copyright Information**

© 1992, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Southern Rincon

**© 1992, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

7feac3cb-fa00-54f1-b2be-b4d6aa29755b